

摘藻堂四庫全書薈要

史部

欽定四庫全書薈要卷八千四百十三

史部

國朝宮史卷十一

宮殿

華蓋閣道上應天文魏闕明堂詳備往牒凡以
式示崇闕由來尚矣我

朝宮殿制度自外朝以至內廷多仍勝國之舊而
斟酌損益皆合於經籍所傳以為億萬年攸芋
攸寧之所煌乎盛哉且夫治莫隆於孝政莫重

於農桑事莫大於祭祀功莫鉅於拓疆綏遠洪
惟我

世祖章皇帝肇立

奉先殿於宮左庸展孝思

聖祖仁皇帝經始豐澤園於西苑敦重田功

世宗憲皇帝締建齋宮於大內虔恭祀事

皇上覲揚

謨烈堂構光昭懿夫孝奉

慈寧爰葺

壽安宮

躬舞稱觴以介

萬壽粵若平定西域豐庸顯鏘迺擴紫光之閣用慶武
成而且齋觀春耦

壇祀先蠶皆太平本計之所寓

鴻規美盛超軼前古況乎

奎章炳耀楹帖禁扁麗若星雲而即境成文日新富

有或以寓箴儆或以暢對育使珥筆而紀者仰
窺敬

天勤民之隱與夫

居所無逸之懷則茲之煥然編帙者固非同三都兩
京徒侈張光明神麗之觀已也今備載規制釐
為六卷就其徑路相屬者聯綴成帙凡

睿藻所及各以其地敬謹詳登焉

宮殿一

外朝

皇城外圍牆三千三百四丈三尺九寸有 天安

東安 西安 地安四門又 天安門外東

西南三面圍牆四百七十一丈三尺六寸正南

門榜曰 大清門東為 長安左門西為 長

安右門重建於乾隆十九年至二十五年工竣

又增築 長安左門外圍牆一百五十五丈

長安右門外圍牆一百六十七丈五尺一寸各

設三座門 紫禁城內圍牆一千六十八丈三

尺二寸其門凡四曰 午門 東華門 西華

門 神武門牆四角有重樓牆外東西北三面

守衛圍房七百三十二間護城河環繞於外河

水由 地安門外西步梁橋下流入 皇城從

地道經 景山西門引入環 紫禁城至 東

西闕門止門下地道相通復東經

太廟左垣西由織女橋前繞

社稷壇 端門

太廟會東來之水過牛郎橋天妃閘從巽方出 皇城

為 御河其流入 紫禁城者由 神武門西

地道引護城河水流入沿西一帶經 武英殿

太和門繞 文華殿後由 鑾駕庫巽方出

紫禁城

大清門在都城 正陽門內面南正中為闕三

皇城之第一門也左右石獅二下馬碑石各一

前為 天街方廣數百步周以石欄俗名碁盤

街門內左右朝房東西向者各一百十楹北向者各三十三楹凡吏兵兩部月選官掣籤刑部秋審禮部鄉會試磨勘俱於此朝房之外東為戶部米倉西為工部木倉其北 天街橫亘東出為 長安左門西出為 長安右門門外各有下馬碑石趨朝者由此出入其北正中南向者榜為

天安門即 皇城南門也初名承天門順治八年
重建改今名為門五上覆崇樓九楹前臨 御
河跨金水橋七橋南北石獅各二其南華表對
峙

國家有大慶典

覃恩於樓上宣

詔設金鳳銜而下焉其北相直榜為

端門康熙六年重建制與 天安門同南立華表

二左右兩廡各二十二楹東為

太廟街門門內為

太廟正南門五楹 前殿九楹兩廡各十五楹 中殿
九楹兩廡各五楹 後殿與 中殿同其正南
門外橋五座橋下向無水乾隆二十六年始引
金水橋水注之東為 神庫牲亭西為 神厨
俱如禮制

御製孟秋時享

大廟詩

庚申

玉斗迴旋屈指庚金輿夙駕紫鸞鳴喬

皇禮樂陳

清廟紉縵雲霞煥寶楹陟降儼臨

神鑒赫顯承佑啟泰階平禮成肅穆瞻霄漢何限依遲

霜露情

御製孟春有事於

太廟詩

甲子

條風漸暉溫春露感心源

精禴遵前制齋躬步

廟門奉

先思曷極觀德畏常存執事咸宗雋秉圭惟孝孫樂初

修拊石禮始溯捍豚薪禋祥烟起繚垣上曉暎

御製孟冬時享

太廟禮成述事詩 甲子

滌志齋三宿

精裡舉質明奉時修

禴祀考樂叶韶韻馨薦忱爰託心忪禮欲成假思不可

度黼若有餘誠如在

音容感孔懷霜露情

橋山凝望處愜優達三京

御製孟冬時享

太廟禮成有述詩

乙丑

祭以時惟孟嘗因節屆貞肅

雖欽

陟降悽愴仰

昭明元酒于尊薦嘉粢我簋盛露霜無那感寒暑不禁

情似覺羹牆見如聞謦欬聲禮儀欣告備綏我假

思成

御製孟春時享

太廟恭述詩

丙寅

卜祥惟穀日修禴考禋宗

太室冠裳肅王春煙靄濃

格思聞謦欬鏗若奏笙鐘受福吾何敢穹冥仰

聖蹤

御製孟夏時享

太廟敬成詩

丙寅

清和方入律禋享正當晨一脈

聲容接千秋禮樂新

格思懷馨歆迄用重逡巡膏澤新敷徧欽承倍惕寅

御製孟夏時享

太廟詩

丁卯

太室穆清地明禋孟夏辰歲時展殷薦

祀事重躬親曙色分籩豆卿雲擁袂振駿奔森玉葉一

本朔天倫

御製孟冬時享

太廟禮成有述詩

丁卯

午門鼓響散晨光

太室修烝繼履霜優愼心源承

一脈躬親祭典重三王宗潢執事邁鉶肅韶樂陳庭磬
管將詎止祈年兼卜世繩繩奕禩奉其鄉

御製孟冬時享

太廟詩

戊辰

元英纔節屆烝祭以時將

太室卿雲煥

五朝帝烈光追思曷有極一脈永流慶制治慙成泰書

年幸告康寧邊心久切儀式志靡遑
儼相通處惟祈我武揚

御製孟春時享

太廟詩

辛未

魯論欽與祭周雅詠於昭

太室修精禴王春報始韶
脰爪髀益衍本木接非遙濟
濟趨三獻依依眇

九霄儼聞希

黻宸顯相肅鵷僚

啓佑鴻規遠丕承仰

五朝

御製孟冬時享

太廟詩

辛未

午門誅蕩鼓嚴晨

太室趨承倍敬寅萬葉皇圖綿衣紹六宗祀典重躬親
黍稷以洽匪今慶籩豆惟嘉依古陳曙色溫暾儀
告備恰欣節應小陽春

御製孟冬時享

太廟詩

壬申

四孟臨陽月六宗欽本仁

祖功千禩顯德水一源親警效思何極繼承志益諄黻

屏儼

來格告徹重逡巡

御製孟夏時享

太廟詩

癸酉

鳳紀純乾月鸞韶清徵音

神功欽在昔

聖翼逮斯今濟濟宗潢列繇繇瓜瓞尋永思有所本

愛敬益殷心

御製孟夏時享

太廟述事詩

甲戌

太室修時享躬親祀事將
本仁思謦欬觀德想衣裳
樂律含清徵南訛屆正陽
若憑欽

降嘏繼序勵其皇

御製孟夏時享

太廟詩

乙亥

祝融臨孟月

太室舉明禋一脈精神貫萬年
第祿蓁拜墀陪列辟執爵進宗親

祖烈於今赫流沙仰集鱗

御製平定準噶爾告祭

太廟述事詩

乙亥

告成蠲祀異嘗蒸

太室薰風瑞靄凝梗化昔延六十載懷恩今挈百千朋
伊犁遼阻奚堪恃

列祖威靈實式憑久計永安方厯念敢因歲事忘兢兢

御製孟冬時享

太廟禮成有作詩

丙子

太室烝禋舉躬親志倍欽代因時遞遠敬與慕俱深
鳳管和韻奏犧尊清酒斟不遲還覺速

優氣儼如臨

御製孟冬時享

太廟禮成紀事詩

丁丑

吉朔修嘗進吉蠲

假思仰冀意顯然洋如在上原一脈勿替引之於萬年三

獻禮成八佾舞小春律在五絲絃午門迎送增蘇對
祖烈今揚西海邊

御製孟夏時享

太廟詩

戊寅

太室修時享律惟仲呂應

開基遡天造綿禩願雲仍禮樂祈

來假几筵儼若憑觀

光誠有志明義究何曾

御製孟冬時享

卷十一

太廟述事詩

戊寅

質明徂位展虔思職事天潢式禮儀

追遠丕綿一脈猗靖遐耆定萬年基不遲廢徹迴瞻

廟有肅冠裳列迓墀昔厠大宛今布露延庥孰匪

祖威貽

御製孟冬時享

太廟詩

己卯

太室修豐祀初陽麗小春萬年福永茂一脈氣彌親磬

管雲門奏豆籩宗器陳於斯思繼述嗣服凜惟寅
御製歲暮祫祭

太廟述事詩

己卯

璇璣臨歲暮

太室祫冬烝

九廟萃神爽一躬凜繼繩瞻羹惜徹饌傳火驗懸燈暮
歷祥花布

天恩倍敬承

御製孟夏時享

太廟詩

庚辰

水木溯源本豆籩式禮儀

思文欽世德貽我幸豐綏祇以瞻依切寧教廢徹遲繼
繩惟日勵敢懈藉

重熙

御製孟夏有事

太廟禮成詩

辛巳

撰日惟中朔協時逮正陽天經欽

與祭世德咏延昌

僊見神容對駿奔宗子襄一灣引金水萬葉衍銀潢

西為

社稷壇門內為壇北向制二成第一成方五丈第二成方五丈三尺高五尺陞四出上用五色土隨方築之壇垣四面開櫺星門繚垣土色亦各以其方瘞位向在壇內乾隆二十一年繕修壇宇勅移於壇外西北隅壇北為

拜殿西為神庫神厨牲亭俱如禮制

御製仲春祭

社稷壇詩

辛酉

秩宗尊百祀，歛福錫羣黎。
典重明禋盛，心殷望歲齊。
牲牷陳俎豆，南雅奏金輦。
六出新飄瑞，公田正好犁。
御製仲春上戊恭祭

社稷壇詩 甲子
東陸暎將曙，熙春日載陽。
明禋遵振古，崇德助

維皇香霧霏，神鼎卿雲擁。

帝觴絲匏方合奏，綴兆早成行。
物備九州貢，土分五

色方一衷虔致願慶錫我年康

御製秋祭

社稷壇詩

丙寅

祈報遵先制虔寅倍已增豐年振

古慶

神貺信今承祝史辭無忝

帝觴露正凝燎煙霏起處晴旭恰東昇

御製仲春躬祭

社稷壇詩

丁卯

重農遵舊制蠲吉舉春祈瑞霽方

壇合

昭明神載依玉繩剛運斗朱鳥旋揚暉佇籲微衷格
甘膏遍甸畿

御製仲春恭祀

社稷壇禮成述事詩

壬申

舉趾東郊農務臨質明

承奠冀

居歆春祈秋報從常典民穀王封合並欽方俎備陳
肥腍物崇牙疊奏太平音潔觴三獻昭和鬯德養

方占歲在壬

御製仲春躬祭

社稷壇詩

癸酉

春祈祀典厘躬行右闕晨趨率辟

卿立我烝民知穀重藐予小子識君輕六鈞綵鳳

儀仙樂三獻卿雲擁

帝觥懸鼓和鳴物甲圻青郊正待省新耕

御製仲春

社稷壇詩

甲戌

玉輦行金闕

松壇祭仲春質儀遵古昔農事重躬親雅樂依聲永
太羹不和醇拳拳何所願綏我屢豐頻

御製春祈

社稷壇詩

乙亥

物土敷壇五色方祈殷親詣練時

良夏松殷柏對誠妄

后稷勾龍配克當八政農先誠國本四時春首祝年
穰前朝甘雪霑優渥舉趾東郊正叶祥

御製春祭

社稷壇禮成述志詩

丙子

鸞輿鳳闕向西旋敬舉

春祈吉戊涓素積烟融雪以後陽烝脈發社之前
於論鐘鼓調宮徵誕降秬稌薦豆邊更翼

庀褫錫昭格獻俘指日外壝邊

御製仲春

社稷壇親祀詩

戊寅

展幣由來例仲春百年

右社聿維新

鴻功今古垂聲永佐配馨香肸鬯均處陸什三司后

土食艱稼穡立烝民戊朝祭喜戊年值豐楙殷希
錫祉申

御製仲春祭

社稷壇詩已卯

午門西轉繚垣通吉戊春祈凜必

躬五土封壇尊

社稷兩珪有邸致欽崇宣太族調元律

惠遍三農贊化工更冀

鴻庥錫保定獻俘壇外報成功

御製

社稷壇禱雨詩

己卯

敢云久矣怒予心躬禱

靈壇重致忱加玉義緣祈芘蔭升香敬用佇

居歆祝辭請命出衷曲皇樂調和冀答陰五日為期
難更緩油雲即待霈甘霖

御製仲春祭

社稷壇禮成誌事詩

庚辰

春祈誌祀晚暉曛

社稷鴻庥

天地同銳首兩珪象生物方中五土表元功夏松殷栢

開宗古

后土

勾龍協饗崇

墳外馘俘獻耆定每思

優貺惕深衷
端門之內東朝房五楹為禮科公署

西朝房五楹為工科公署禮科之北為

太廟神厨門工科之北為

社左門再北左右朝房各四十二楹內東二十三楹
西二十楹為六部九卿朝房餘吏科公署七楹
戶科公署九楹在東中書科公署六楹兵部公
署七楹刑科公署七楹又六科公所二楹在西
其吏科之北三楹敬安石刻

聖祖仁皇帝御製臺省箴 臺省之設言責斯專寄以
耳目寧取具員通明無滯公正無偏黨援宜化畛域
宜捐洞達政體斯曰能賢古昔諍臣風規凜然訏謨

謹論垂光簡編朕每覽繹如鑑在懸居是官者表裏
方直精白乃心充廣其識國計民生臧否黜陟凡所
敷陳敬將悃愾風霜之任以懲奸慝搏擊之威以儆
貪墨毋撫細務苟塞言責毋紛成憲妄逞胸臆書思
入告當寧對揚沾名匪正營私孔傷或蔽嫌怨謬為
雌黃受人指囑尤為不臧形諸奏牘有玷皂囊職司
獻替亟宜審詳敬爾在公風紀嚴廊詞箴用勗誕告
聯常康熙庚辰御製并書 又北東出者為 闕左

門西出者為闕右門門外各有下馬碑石凡
九卿會議揀選人員驗看月官俱集左門下八
旗都統會議俱集右門下門北為諸王朝房左
右各三楹甬道左有嘉量亭右有日景晷度

御製嘉量銘 皇予

聖祖建極憲天度律鈞鍾洞契元聲微顯闡幽何天衢
亨小子纘緒寰區撫臨協時月正日同律度量衡
製茲法器列於大廷匪作伊述

大猷敬承遵鍾得度承度量成量為權輿律諧六英猗

聖合

天

天心

聖明七政是齊為萬世法程如衡無私如權不凝如度

制節如量祇平律得環中紹

天明命永寶用享子孫繩繩我日斯邁而月斯征中元

甲子乾隆御銘 正中南向為

午門順治四年建即紫禁城南門也東西兩觀
對聳上覆崇樓五中樓深廣各九楹東西四樓
深廣各五楹閣道十三楹南北相接崇宏壯麗
即俗所謂五鳳樓也

國家有所征討凱旋獻俘

皇帝御午門樓行受俘禮

御製六月十八日午門受俘詩

乙亥

雷霆申宿令

閭闔受新俘詎乃恩全背安能誅竟逋緝凶新附

奮宵命舊奸瞿白練陳班末雙頑肆市衢快晴

天意順大禮衆情愉益切欽心鏡永懷翠帝圖

御製定北將軍班第遣人解達瓦齊至御午門受俘詩

乙亥

駕瓦繽紛積瑞銀受俘軍禮舉重新丹墀羣

辟齊肩侍白組名王繫頸陳天德好生還貸死海濱

多蹇又逢屯刑曹憲典聊遲待指日歐刀剗叛臣

御製御午門受俘馘詩

庚辰

函首霍占來月竄傾

心素坦款天閭理官淑問寧須試驃騎窮追實可

臧西海永清武保定午門三御典昭詳從今更願
無斯事休養吾民共樂康中樓左右有鐘鼓亭
皇帝御大朝則鳴鐘鼓以為節

親祀壇廟出午門則以鐘祭

太廟則以鼓午門之前凡頒朔宣

旨及百官常朝俱集於此

御製十月朔日頒時憲書詩

庚申

九瀛咸奉朔四

海正同文禮特遵

先制時惟授大君令頒懸度地澤被鷺鷥羣欽若心恒
凜釐工政益勤

御製頒朔詩

甲子

闕宮烝祀罷象魏授時頒舊歲行將盡新年去復還時
和詎可恃日久倍知艱所願周寰宇官清民自閒
試問司天史羲娥移不移璿璣誰可度珠斗若
為推六合車書會千秋道法垂去年重入想崇政
涖朝時

御製頒朔詩

丁卯

冬初頒歲朔

天道體貞元為識農功要非誇天子尊三正同六服玉

律自金門即看陽和近披來朱鳥燄

御製頒朔詩

戊辰

午門晴旭麗瞳矐頒朔威儀集

百工東鰈西鷄萬邦奉宵衣盱食一篇中春秋無
那成今昔箕畢還因協雨風消息貞元頻靜驗統
天一氣運無窮

御製十月朔日頒朔詩

丁丑

敬授斯稱重明時敢

不虞龍杓弦望辨鳳闕典章懸堯帝羲和命大清
億萬年銅儀惟是在稼政莫茲先布朔禎祥始班
和象魏前伊犁哈薩克從此入華編

午門為門三文武官出入皆由左其右門惟宗
室王公得行之兩觀間掖門左右相對門中各
折而北入不常啟惟

大朝陞殿百官各以東西班次由掖門入殿試文武
進士鴻臚寺按中式名次引入一名由左二名

由右餘倣此 午門之內玉河環繞金水橋五座橋北為

太和門廣宇九楹中開三門其左右兩楹則宿衛番直處也門陞南出者三東西出者二級各二十有八陞間列古銅鼎四門前列銅獅二太和門之左為 昭德門右為 貞度門皆南向東西兩廡間東出者為 協和門西出者為 熙和門兩廡上下共五十二楹東為稽查各衙

門奉行事件處及內閣

誥勅房西為繙書房及

起居注公署東南隅為內閣公署其正衙

御筆扁曰調和元氣西南隅舊為國史館今為膳
房庫 太和門內正中南面為

太和殿

皇朝之正殿也康熙八年重建三十四年再建深廣

各十一楹

御筆扁曰建極綏猷聯曰帝命式于九圍茲維艱哉
奈何弗敬天心佑夫一德於時保之適求厥寧
中設

寶座

皇帝大朝御馬每歲元旦冬至

萬壽三大節及

國家有大慶典則

御殿受賀凡大朝會燕饗

命將出師

臨軒策士及百僚除授謝

恩皆御焉恭遇加上

皇太后徽號則於殿內

閱視

冊寶冊立

皇后亦如之遇

圜丘大祀前一日

皇帝於殿內視祝版

祈穀

常雩大祀亦如之前為露臺列龜鶴彝器各二日晷嘉
量各一龍墀三重丹陛五出下重陛級二十三
中上二重陛級各九上下列寶鼎十有八左為
中左門右為中右門皆南向與昭德
貞度二門相對其東出者為左翼門西出
者為右翼門翼門之南左為體仁閣右為

弘義閣各崇樓九楹廊廡四周相接共六十
六楹庭中甬道左右設品級銅山自正一品至
從九品各十八為文武官員行禮班位

御製季夏視朝詩

已巳

詰旦奎中夜易闌采窓曙

色上金鑾宮懸樂應林鍾律拜舞班齊九品官何
必舍人稱絕唱所希多士副其難漫言例是鴻臚
掌拱手垂衣敢自安

御製暮春太和殿視朝詩

壬申

迭蕩天門開曙曦

彤墀香靄露華滋
禮章樂亮誠何有
拱手垂衣念
在茲
百辟都遵博士制
七言誰繼舍人詩
昭容已
襲貂璫僭未可
明廷贊盛儀

御製初夏視朝詩

壬申

雨足金門曉氣和
觚稜瑞

色映晨娥樂宣清徵八音
協儀引鴻臚百辟多祈
歲惕乾通宥密對時長
養驗南訛垂衣敢恃崇
高位政要維艱敕九歌

御製御殿臚唱有作

壬申

秋榜原春榜恩科乃特

科

慈寧欣壽永師濟異材多大對誰忠告旁求此廣羅午

門開詆蕩日麗小春和

御製御殿傳臚日作

甲戌

臚唱三聲曉日曛編鐘

清瑟協薰風希占五色雲朝見早慰一犁雨昨濛

贊化羣陳萬言策敕幾自闢四門聰祇憐退鷁垂

雙翅空望神仙注榜中

御製視朝詩

乙亥

曉日觚稜露氣鮮太和朝

音招御

奏宮懸有來袞袞皆羣后惟曰繩繩欲萬年予意
詎如常例視侍臣誰進早朝篇無為垂拱猶增愧
臨保心殷勵體乾

御製平定準噶爾功成恭上

皇太后徽號御殿受賀詩以言志詩

乙亥

從來西北

不庭方戡亂聊攜數月糧何必先驅張撻伐早知
載道迎壺漿遐荒底定千秋宴

徽號欣承愛日慶豈不慰思寧即慰訓垂文子懼方長

御製雪中視朝詩

丙子

報曉雞人報雪霏翠雲裘

御啓彤扉祥煙低罩金猊鼎瑞葉紛飄赤羽旂三
白早占后稷穡千官都點謝莊衣明庭端拱承

天貺益勵兢兢謹勅幾

御製冬日視朝詩

丁丑

百寮劍佩集明廷班末陪

臣贊謁聆黃道星辰聯畢昴小陽氣節霽元冥東
鰓西鰈誰分域北極南荒一太寧遠服邇安心敢

肆敬

天勤政

訓聰聽

御製太和殿朝會庸作歌

庚辰

晨叅畫會肅朝儀

正殿春融赤羽旗
考夏綜周原
舊典戛球舞
籥迂
新禧十年一舉寧
為數萬國來同倍
切寅吏治民

生厘宵旰問方詎
止藉斯時
祥花瑞葉玉樓棲

慶恰占年景
福禔耆定不期徠
默克安和惟是洽
羣黎漫陳漢殿魚
跳水却聽天方鳳
奏西簪筆誰

成元會賦持盈應悉敬彌躋

御製三月朔日御殿定邊將軍兆惠副將軍富德等

率成功諸將士朝謁詩以紀事

庚辰

黃麾簇仗

正衙排奏凱來朝樂孔皆脫劍釋冰搖玉佩卷班
按隊叩金階幸逢耆定干戈戢况值熙和風日佳
范士燮言予敢忘惴矜保泰是長懷

御製四月二十五日御殿傳臚紀事詩

辛巳

雅化

作人祝

壽慈金階臚唱麗晴曦既求真學頒新制亦體常情改
近期公舉不教存已見明教還預定其辭西人魁
榜西平後可識

天心偃武時

御製季夏太和殿視朝詩

辛巳

一夜陰晴雲未消

朝氛斂盡旭光昭或緣敬事蒙

天佑雖喜宜農戒意驕恭已奉三欽宸御宅中圖治慎
衣宵林鍾東序聲韶樂應月詳求律呂調

殿後為

中和殿深廣各五楹上安滲金圓頂陛左右出各
三重級如前殿之數殿內

御筆扁曰允執厥中聯曰時乘六龍以御天所其無
逸用敷五福而錫極彰厥有常中設

寶座凡遇三大節

皇帝先於此陞座內閣內大臣禮部都察院翰林院
詹事府堂官及侍衛執事人員行禮畢然後出

御太和殿恭遇上

皇太后徽號則於殿內

閱視奏書遇

方澤大祀及祀

太廟

社稷之前一日

皇帝俱於殿內視祝版

親祭

歷代帝王廟

先師孔子

朝日 夕月亦如之每歲耕藉並於殿內

閱視農器殿後為

保和殿殿九楹

御筆扁曰皇建有極朕曰祖訓昭垂我後嗣子孫尚
克欽承有永天心降鑒惟萬方臣庶當思容保無
疆中設

寶座每歲除夕

皇帝御殿筵宴外藩每科朝考新進士翰林院引入

殿內左右列試殿之左門曰後左門右門曰

後右門與中左中右門相對自太和

殿至保和殿兩廡丹楹相接四隅各有崇樓

中路甬道相屬保和殿後陞三出向北即

乾清門也

協和門之東為

文華殿康熙二十二年建殿門五楹前殿七楹

御筆扁曰緝熙明德聯曰道脈相承經籍昭垂千聖
緒心源若接羹牆默契百王傳每歲春秋仲月

皇上御經筵講臣於殿內進講

皇上宣示御論諸臣跪聽畢以次列坐

賜茶於殿內

御製秋日經筵詩

庚申

皎日麗中天金風拂細旃

右文遵舊制典學重經筵為進邦家彥爰咨經史

詮探源思汲古望道未忘筌制事應惟義執中猶
在權心恒期洞洞志每勵乾乾緬想萬民上端資
百爾賢周行頒示我莫漫頌豐年

御製二月十二日經筵詩

辛酉

金門旭日麗初晴

講席春和盛典行啟沃久登黃閣老探研今對玉
堂卿祇因風化享民俗漫道平康起頌聲猶憶昔
年

庭訓切書紳一字道惟誠

御製仲春經筵詩

壬戌

旭日御堦明祥風滿鳳城

光春開講席廣厦集朝英學海期同濟文樞賴共
衡更尋司化紐要道在躬行

御製二月初六日經筵詩

癸亥

風色雲容淡沲春

廣庭鵷侶列華茵欲衡今古惟時叙藉澡身心與
日新別苑漫傳花似綺甫田喜積屑如銀自慚致
治非三五夢想蕭曹房杜臣

御製仲春經筵詩

甲子

講席啟文華熙春景物嘉

古今學有別天地德無涯內外應非二知行要並
加儒臣同坐論不覺日西斜

御製春季經筵詩

乙丑

琴麗翠鸞臨文華廣殿深

三春開講幄兩序列朝簪立政思民瘼存誠勵口
箴宣云循典故藉以澡身心黼座風颺德霞天旭
散陰容詢交泰陞揖讓萃儒林道岸繫常企文淵
或可尋研精憶良弼孰與下砭鍼

御製仲春經筵詩

丙寅

晴旭曛曛散曙寒文華廣

殿會衣冠從來聖道通參贊況復予衷企治安心
所會時原自易學惟行處始知難寄言魚雅談經
侶漫作崇儒故事觀

御製仲秋經筵詩

丙寅

宿雨逗輕烟秋陽皎碧天

文華開廣殿今日啟經筵濟濟駕班列彬彬玉案
前研幾窮理窟味道晰言筌一意期無逸同心慶
有年豈惟遵典制端以邈心傳

御製仲春經筵詩

丁卯

講幄啟芳春文華紫禁闈

鵷班分列進綈几一編陳治道籌教養躬行勉知
仁豈惟遵典故端藉淑心身易簡抽經祕從容咨
席珍擴充還有待夙夜矢虔寅

御製仲春經筵詩

己巳

瑞日輝春曉不寒特開廣

殿集衣冠舞干未逮重華德放馬何期遠服安小
往大來成泰運推人盡已具心官申咨魚雅章縫
侶莫作崇儒例事看

御製仲春經筵詩

壬申

間闕經筵意未安東風廣

厦集儒官不惟勤學因時最要復存羊俾後觀制
事期無適莫見知心更念惠懷難春卿儀注百察
式詎道從容禮數寬

御製經筵即事詩

癸酉

清暉玉宇寬廣殿集衣冠

要欲分陰惜寧同舊例看繹思還戒頌切已率知
難兩論雖言概吾斯意未安

御製仲春經筵詩

丙子

泉汲靈源蕉剥芽春風入

復啟文華惜陰所重恒於此隔歲猶嫌忽已賒一

日萬幾天命勅性誠明教聖功加儒官采服魚魚
者典學虛丈莫漫誇

御製仲春經筵詩

戊寅

書文經訓義揄揚魚雅儒

簪晉兩行篤志近思研學問思艱圖易劬農桑春
臺共喜時方鬯廣廈寧惟例舉常周孔吾師游意
切推行獨慚未云遑

御製仲春經筵詩

己卯

講學文華例仲春經書次

第几端陳夫乾易矣夫坤簡成物知焉成己仁紬

繹從知位中理贊叅惟仰至誠神漫言故事循禮
典修業輝光勉日新

御製仲春經筵詩

庚辰

文華廣殿御香芬啟迪疇

容大雅羣詎止循名欲求實敢因戢武忘崇文飛
潛動植堪觀化和一慎難總屬君畧迷會心非逞
臆躬行惟是勉尊聞

御製仲春經筵詩

辛巳

和凝風日仲春初廣殿文

華敞碧疏經解傳詮闡要道衣寬帶博戒虛車人

倫物理行仁義巽養震為濟疾徐詎曰年年遵典
故化民成俗目蒿予 東廡曰 本仁殿西廡曰
集義殿後殿為 主敬殿其東為 傳心殿
中祀

皇師 帝師 王師 先聖 先師每逢月朔太
常寺堂官一員詣殿拈香凡

經筵之日

命大學士一員祭告乾隆七年仲春

皇上御經筵

特旨親詣行禮殿之前為景行門

御製仲春經筵親詣傳心殿行禮敬成一章

辛酉

布治遵前矩崇文御講筵先期修祀事親詣致心
虔禮樂薄殷夏經綸在簡編執中恒自凜敢曰繼
薪傳文華殿之後西向為上駟院署又北南向
為箭亭亭中石刻乾隆十七年三月二十日

上諭朕恭閱

太宗文皇帝實錄內載崇德元年十一月癸丑日

上御翔鳳樓集諸親王郡王貝勒固山額真都察院官
命弘文院大臣讀大金世宗本紀

上諭衆曰爾等審聽之世宗蒙古漢人諸國聲名顯著
之賢君也故當時後世咸稱為小堯舜朕批覽此書
悉其梗概殊覺心往神馳耳目倍加明快不勝嘆賞
朕思金太祖太宗法度詳明可垂久遠至熙宗合喇
及完顏亮之世盡廢之耽于酒色盤樂無度效漢人

之陋習世宗即位奮圖法祖勤求治理惟恐子孫仍效漢俗預為禁約屢以無忘祖宗為訓衣服語言悉遵舊制時時練習騎射以備武功雖垂訓如此後世之君漸至懈廢忘其騎射至于哀宗社稷傾危國遂滅亡乃知凡為君者耽于酒色未有不亡者也先時儒臣巴克什達海庫爾纏屢勸朕改滿洲衣冠效漢人服飾制度朕不從輒以為朕不納諫朕試設為比喻如我等于此聚集寬衣大袖左佩矢右挾弓忽遇

碩翁科羅巴圖魯勞薩挺身突入我等能禦之乎若
廢騎射寬衣大袖待他人割肉而後食與尚左手之
人何以異也朕發此言實為子孫萬世之計也在朕
身豈有更變之理恐後世子孫忘舊制廢騎射以效
漢俗故常切此慮耳我國士卒初有幾何因嫻於騎
射所以野戰則克攻城則取天下共稱我兵曰立則
不動搖進則不回顧威名震懾莫與爭鋒此番往征
燕兵出邊我之軍威竟為爾八大臣所累矣故諭爾

等其謹識朕言欽此朕每敬讀

聖謨不勝欽凜感慕深惟國家開創之時我

祖宗躬親勞瘁勤求治理矩矱相傳罔敢踰越以立萬
世之丕基至於今咸受無疆之福者皆仰遵

明訓所致也我朝滿洲先正遺風自當永遠遵循守而
勿替是以朕常躬率八旗臣僕行圍較獵時時以
學習國語熟練騎射操演技勇諄切訓誨無非率
由舊章期以傳之奕禩永綿福祚惟是我

皇祖太宗聖訓所垂載在

實錄若非刊刻宣示則累朝相傳之家法外庭臣僕何
由共悉且自古顯謨令典多泐之金石曉諭羣工
我

皇祖太宗之睿聖特申誥誡昭示來茲益當敬勒貞珉
永垂法守著於紫禁箭亭御園引見樓及侍衛教
場八旗教場各立碑刊刻以昭朕紹述推廣至意
俾我後世子孫臣庶咸知滿洲舊制敬謹遵循學

習騎射嫺熟國語敦崇淳樸屏去浮華毋或稍有
怠惰式克欽承

彝訓冀億萬世子孫共享無疆之庥焉特諭 殿東稍
北有石橋三過橋有殿宇三所凡大內俱黃琉璃瓦
惟此用綠為諸

皇子所居其前為王公文武大臣輪班宿衛直房
橋東南為戶部內庫為鑾儀衛 鑾駕庫稍北
即東華門門外有下馬碑石 紫禁城之東

門也

熙和門之西為

武英殿規制如 文華門前 御河環繞石橋三

殿前後二重皆貯書籍凡

欽定命刊諸書俱於殿左右直房校刻裝潢西有浴
德堂為詞臣校書直次設總裁統之殿北為內
務府公署為果房為冰窖為造辦處殿西為尚
衣監其後殿宇二層為

皇子所居再西為咸安宮教習八旗大臣子弟
肄業處殿南為磁器庫為南薰殿乾隆十四
年

詔以內府所藏歷代帝后圖像尊藏於此

御製南薰殿奉藏圖像記 內府藏歷代帝后圖像

傳自勝國典在有司歲以盛夏曝而度之局鐫惟
謹朕於幾暇省閱內庫積儲敬得展觀則裝潢之
以歲久渝脫者已多矣因思我朝崇禮前代建廟

京師春秋裡享且為護陵寢禁樵蘇聖賢名臣咸

秩典祀凡以篤高山景行之思抒萬古興懷之慕

而況流傳有自縑素猶新日角珠庭冕旒秀發德

容可挹英表如生其奚忍夷諸繪事供几席珍鑒

者比爰命工重加裝潢自太皞伏羲氏而下帝后

圖像為軸者六十有八為冊者七為卷者三先聖

名賢圖冊五舉襲以綈錦尊藏於紫禁西南之南

薰殿大學士會同領內務府王大臣等詳定位置

謹其籍識次第甲乙秩然有章明諸帝玉冊廟中
所陳當時寶為宗器者也今貯工部外庫慮不免
散軼附藏殿之西室俾虔視焉既竣事因備紀之
勒石前榮以示帝統相承道脈斯在朕之隨在盡
其誠敬不敢苟且褻越有如此圖像自唐宋以下
缺十之二三邇而上之存者僅矣時久而易晦幸
其存也可弗保持使可及久歟缺者弗復追補遠
無徵也懼失真也以致慎也

御製朕既藏歷代帝后名臣像於南薰殿為大以記
之並成是詩已已寫照應非古義軒誰所傳儼


茲瞻日角敬與保天全暑雨寧侵幌薰風尚入絃
畢然興景仰壽治免勤乾殿西為

御書處凡

御書法帖皆於此鐫刻稍北即西華門門外有下
馬碑石紫禁城之西門也



國朝宮史卷十一



總校官庶吉士臣侍朝

校對官編修臣莫瞻菴

膳錄監生臣張槎

欽定四庫全書薈要

史部

國朝宮史卷十二



詳校官員外郎臣楊世綸

欽定四庫全書薈要卷八千四百十四

史部

國朝宮史卷十二

宮殿二

內廷一


乾清門廣宇五楹中門三陛三出各九級前列金

獅二

皇帝御門聽政則於門下陳設

御座黼宸部院以次啟事內閣面承

諭旨於此

聖祖仁皇帝御製宮門聽政示閣部諸臣詩 中書天
下本六官庶僚首絲綸委寄隆分職慎所守上相列
天階喉舌筦北斗乾象方昭垂古來詎虛授軒皇置
六相姬文擇四友得人邦乃昌此事諒非偶曰予既
寡昧欲然謝哲后聽政日不遑望道遠何有啟沃藉
臣鄰匡贊資左右雖云際昇平民物豈康阜圖終貴
謹始治安莫予狃廣業惟克勤勵精期永久作詩一

相勗敬哉庶無負

御製御門詩 丁卯

凌晨御內朝咨采接羣彥嘉言

孰予告庶政惟爾贊稍釋望雨愁未愜求治願周
公古元哲猶坐以待旦欽哉與日深敢恃

天恩眷

御製御門詩 丁卯

禁門咨庶事常朝接羣彥銀蟾

尚餘光蓮漏初停箭慄慄切獨懼魚魚偕衆選豈
其旅進退實以資匡贊坦平文石陞淨潔龍書案

勗哉亮采儔佇爾嘉言薦

御製御門詩

庚午

明庭靄曙色宵衣戒晏朝恭已

勅庶幾疇咨觀百僚際和轉憂盛知近詎達遙察
察匪為明熙熙或致驕惠民詔屢逮毋乃屯其膏
求賢念輒塵或則虛名要孜孜敢怠荒目蒿思亦
焦所希萬方逸遑惜一已勞

御製御門日作詩

辛未

一二日萬幾勤政遵

家法疇咨內朝門封章待批答率由貴有恒龍案延黃

閣敷政權剛柔省身切兢業民風願還淳歲功期
允協每懷乃靡遂蒿目奈才乏

御製御門日作詩

壬申

興夙列卿齊唱曉雞人報

時巡返旌轡召對臨廊廟勅幾固無方咨政貴有
要察察戒小智淵淵塵朗照唐虞夙所希成康猶
未造設逢汲長孺豈免云云誚

御製御門日作詩

癸酉

建禮接晨趨乘乾奉永圖

勅幾遑燕寢咨政闕亨衢曉日琉璃瓦香煙翡翠

鑪後言誰退有成見我從無

御製御門日作詩

甲戌

黃閣封章待綍音明廷敷

對詰晨臨疇咨晝接寧惟是典禮時脩更欲尋三
九期餘常座念剛柔異克不容心遑云撫莅茲年
久益覺憂勤與日深

御製御門口號詩

丙子

御門閣部奏封章進止疇

咨不厭詳一日萬幾寧止是要因愛禮亦存羊

御製御門日作詩

丙子

省方秋蹕旋勅幾明廷莅

改遊曷可極功叙無非事虞機省厥括絲綸慎所
自疇咨實在茲都俞益增愧無過孰則能動是吁
可憐

御製御門日作詩

丁丑

南巡三閱月勅幾心敢懈

問民晉岳牧諮政接寮案驛章按程遞批答或至
亥庭對雖故事愛禮正茲在迴鑾所先務百爾共
亮采念彼勞始逸勗此敬勝怠周易有名言乾惕
時自宰

御製御門日作詩已卯

巡狩亦萬幾詎有間宵旰

還宮即御門朝簪亟延見敢云寧藉斯愛禮語彌
羨庶政酌剛柔羣材掄俊彥惟是稱職艱握吐懷
公旦凡召對臣工引見庶僚俱由門之右門出
入內廷行走之大臣官員俱得由之乾清

門之旁左為內左門右為內右門皆南向

內左門不常啟凡內官及承應人等出入俱
由內右門軍機處大臣南書房翰林內務

府大臣官員出入亦得由之如遇

皇帝御養心殿召對大臣之年老者亦得於此門引
進墀下東出者為景運門西出者為隆宗
門皆五楹門各三內左門之東內右門之
西周廬各十二楹東為文武大臣奏事待漏之
所西為侍衛房及內務府軍機處直舍皆南向
其南相對周廬各五東為宗室王公奏事待漏
之所西為內繙書房皆乾隆十二年建
乾清

門之內為

乾清宮順治十二年建康熙八年重建

皇帝召對臣工引見庶僚皆御焉宮廣九楹深五楹

正中設

寶座左右列圖史璣衡彝器楣間南向恭懸

世祖章皇帝御筆扁曰正大光明

聖祖仁皇帝恭跋云

皇考世祖章皇帝御筆正大光明四字結構蒼秀超越

古今仰見

聖神文武精一執中發於揮毫之間光昭日月誠足媲美心傳朕罔不時為欽若敬摩勒石垂諸永久為子孫萬世法康熙十五年正月吉旦恭跋兩楹恭懸

聖祖仁皇帝御筆聯曰表正萬邦慎厥身修思永弘敷五典無輕民事惟難北兩楹

御筆聯曰克寬克仁仁皇建其有極惟精惟一道積于

厥躬 東暖閣扁曰抑齋 西暖閣扁曰溫室

殿前露臺列龜鶴各二晷影嘉量各一寶鼎四
中為甬道與 乾清門相屬左右丹陛南出者
二東西出者各一東西丹陛之下有文石臺二
上安設

社稷江山金殿

御製乾清宮銘

大哉至健純粹而精昭昭成象蕩

蕩難名四德嬪用六位時乘靜專動直資始大生

我

祖我

考奉是丹楹五福敷錫萬國咸寧敢恃崇居惴惴矜矜
益慎體乾惟皇永清

聖祖仁皇帝御製乾清宮讀書記 二帝三王之治夏

然尚矣後之人興於千百世之下而欲遐稽往烈以
為多聞畜德之資非載籍是賴厥道無由顧載籍極
博大而道德之淺深政理之因革小而聲名度數采
章文物之繁靡弗該也靡弗悉也若徒習其文詞侈

其浩博而不深考其道法之大原得諸心而致諸用
古人之言皆陳迹耳於我何與焉朕自沖齡性耽學
問踐祚迄今罔自暇逸未明求衣待旦視事講臣執
經羣工入奏未嘗一日不與相接既退裁決庶務披
覽章疏有間則書冊翰墨之外無他嗜好端居乾清
宮取六經之書發而讀之以求契夫古聖人之心將
以致其用而未能也又上下古今盱衡數千載思昔
人之所以致其用者而求之乎紀志表傳編年紀事

之文將以考其用而知其心之所存朝斯夕斯怡然
忘倦蓋浩乎其未有涯悠然其未有艾也比者海宇
乂安國家閒暇而風俗人心未能登進淳良聿臻上
理每一念之憫然於懷將以得之於心者而實致諸
用焉積晦明閱寒暑展卷吟誦神理淵穆如晤古人
夫乾為健天得一以清所貴執中而建極也自強不
息以希天遜志好學以希聖朕雖不敏詎弗勉旃
聖祖仁皇帝御製元夜與諸王宴乾清宮詩 今夕丹

帷宴聯翩集懿親傳柑宜令節行葦樂芳春香泛紅
螺重光搖絳蠟新不須歌湛露明月足留人

世宗憲皇帝御製恭侍乾清宮詩 殿閣參差際碧天

玉階秋色靜芊綿雲開北闕祥光滿雨過西山霽色
鮮寶座金爐香靄靄彤墀仙掌露涓涓承顏頻荷
溫顏接凜惕趨蹌繡宸前

御製九日乾清宮侍宴恭紀詩

樂善堂集

繡錯仙枝煥

彩霞重陽侍宴佩萸華牋分

御筆親標韻席撤

皇恩別賜瓜一德賡歌仁壽世太和景象

聖人家獻詩爵躍追天保宴畢歸來日未斜

御製新正二日召集羣臣於乾清宮賦柏梁體詩朕

既首倡又成七言一章詩已未

泰交堂陞列駕

聯日暖彤墀淑景鮮祇以賡歌鳴喜起非誇宴樂
沸絲絃觴浮柏葉添吟興筆灑瓊華映綺筵更慶
元正飄六出又增新瑞紀瑤編

御製元旦同諸王宴乾清宮詩

壬戌

韶律應三陽

元辰福履昌展親醕伯叔明命凜

穹蒼鳳琯春風入龍墀化日長獻椒歌有慶行葦樂無

央

御製立春日奉迎

皇太后幸乾清宮侍宴恭紀詩

乙丑

日色風光麗綵

粉起居

膝下肅而閤緣階瑞莢舒三葉貼戶春屏燦五雲青帝

乘時方煦嫗勾芒御氣正氤氲晚來絲管城闌鬧
椒獻家家想半醺

御製新正奉

皇太后乾清宮侍宴得句詩

丙寅

瑞雪占時慶和風

驅臘寒銅鰲仙木麗蘭祀玉華攢爵躍迎仙仗

慈寧降葆鸞獻春陳桂醑履歲尚椒盤淑景欣昭盎祥
雲看簇團初韶娛愛日長奉

萬年歡

御製元日乾清宮宴諸王即席得句詩

庚午

元日

乾清宴本支百世親豐年占首歲和氣霽韶辰柏

葉浮醺醪椒花煥挾振銀箋將玉管次第答光春

御製乾清宮小宴宗室臣工即席得句詩

辛未

初

筵和會景含韶瑞色瓊樓雪未消已覺心期欣夏

麥好酬節物頌春椒紫觴底用行麟脯青律徐聞

引鳳簫行葦載歌厘保泰百年一統正熙朝

御製乾清宮宴親藩即席賦句詩

乙亥

俶春始運

啟元辰曲宴乾清會懿親同有殷心祈上歲從來
樂事首天倫欣徵人壽樽浮柏漫詡仙厨脯擘麟
和氣一家時斂福便因敷錫萬方民

御製乾清宮小宴諸王即席得句詩

丁丑

紫鳳迴

春歲籥調乾清嘉會慶三朝化民政要先敦族行
葦歌聲竝頌椒共祝康年遍寰宇端知和氣靄宮
寮本支百世綿瓜瓞景福如川御正饒 乾清宮
之東為

昭仁殿殿內

御筆扁曰天祿琳琅聯曰風奏南薰調玉軫霞懸東
壁燦瑤圖殿後西室聯曰有秋歷覽登三黼盱
食惟期協九經又聯曰獨喜惜陰澄靜照更因
稽古契遐心室之北扁曰慎儉德聯曰亦曰欽
哉貫謨典允惟難矣作君師又聯曰瓊枝春意
足縹帙古香多皆

御筆也

御製昭仁殿銘 四德何以首元四時何以首春仁
者人也要莫大於親親刑寡妻以至兄弟民同胞
而物吾與皆由此施關痛癢而肫肫然其所包者
廣是以孔子對門人之問不同而莫非由己之所
存人盡宜勉又何況乎為君吾用是居昭仁之殿
怵然惟恐有愧乎斯言

聖祖仁皇帝御製昭仁殿詩 雕梁雙鳳舞畫棟六龍
飛崇高惟在德壯麗豈為威

御製昭仁殿詩丁卯 乾清宮之東移為昭仁殿

皇祖在御時日夕寢興之溫室也朕弗敢居焉乃貯天
祿琳琅宋元鐫本於內時一徘徊曷勝今昔之思
芸帷木榻想貽淳

聖日常懸麗袂振六十一年茲惕息百千萬世永昭仁
好書敢謂承

先志新德惟期澡我身簷向周廬列書室每聞佔畢達
楓宸 乾清宮之西為

弘德殿殿內

御筆扁曰奉三無私聯曰二典三謨法堯舜之道五
風十雨協天地之心殿後扁曰太古心東室閣
上恭懸

世宗憲皇帝御筆聯曰惟以一人治天下豈為天下奉
一人

御筆聯曰九疇勤省歲萬國協書雲閣下聯曰得句
因新意耽書是宿緣一曰墨汁潤分瑤草綠篆

文清帶筆花香後室扁曰懷永圖聯曰雲霞紛
綺麗文物共歲蕤一曰心爽天宇豁情欣理境
融皆

御筆也

御製弘德殿銘 求全之毀吉德也辨之不已是惑
也不虞之譽凶德也居之不疑是惑也知惑不為
直言其來知惑而為諛言其滋諛滋悔生直來其
亨宜已而辨汝奚為善宜疑而居汝惑奚祛屏乎

營乎其思德之所弘乎

御製弘德殿詩

辛酉

高閣傳銀箭朝曦散綺疏憂

心周蔀屋豈隔九重居

御製弘德殿詩

丁卯

軒宮象紫垣璇移接路寢居

中撫八埏奉三育羣品儉詒堦尚土侈戒帷裁錦

萬幾常自惕庶政於焉審但希六幕調宵衣亦安

枕

御製弘德殿齋居詩

辛巳

致齋返彤宮勅幾臨紫

殿對時凜金柅惜陰吟玉箭弘德構斯肯循名實
期踐敬

天在愛民居貴可忘賤籌治誠契要勵人已敢倦時豫
允厚幸厚幸益兢戰庶幾奉

前猷億載皇清奠 宮之東廡內臣直廬三楹

聖祖仁皇帝御筆扁曰御茶房稍南為

端凝殿

聖祖仁皇帝御筆扁曰執事

聖祖仁皇帝御製端凝殿齋居詩 肅肅羣籟屏裊裊

爐煙舒諏日躬禋祀濯被臨齋居輝輝閣西日流影
照綺疏坐久微風來泠然吹衣裾霽心觀萬象默見
天地初感神在至誠寧俟灌鬯餘 再南為舊設自
鳴鐘處

聖祖仁皇帝御筆扁曰敬天

御筆聯曰簾縈香篆齋心久座殷鐘聲問夜遙其南
東出者為 日精門門之南為

御藥房

聖祖仁皇帝御書扁曰藥房曰壽世再南一室奉

至聖先師及先賢先儒神位

御筆扁曰與天地參聯曰開洙泗心傳聖由天縱集
唐虞道統德合時中轉而南向北者為

上書房

皇子

皇孫肄業處也

御筆扁曰養正毓德

世宗憲皇帝御筆聯曰立身以至誠為本讀書以明理
為先

御筆聯曰念終始典于學於緝熙單厥心

御製己酉冬十一月二十一日

皇父御書立身以至誠為本讀書以明理為先一聯

恩賜懸掛書齋以寓訓誨至意恭紀詩

樂善堂集

文明雅

化敷重譯咫尺

奎章寶玉除妙義直須十四字至言已勝萬千書

天顏有喜龍鸞動細案承

恩雨露舒從此就將當益奮敢違提訓負居諸

御製仲冬御門後至上書房因示弘瞻輩詩

壬戌

綰帙芸編散古香經帷舊學重商量憂心未釋勅
幾暇樂志旋生味道長緹室灰飛新景物瑣窓日

上昔年光吟餘改抹前題句未得筌蹄頓兩忘

御製每御乾清宮輒聞上書房諸皇子誦讀聲欣然

會心兼憶舊況詩

乙丑

佔畢達璫除居稽切講

廬為聲何朗朗毓德想魚魚教子慙貞觀延師企
二疏豈如王氏癖頗鄙李生漁樂志因時敏研精
值歲餘明窓晴旭暖忽憶十年初

御製秋仲丁祭日詣上書房

至聖前行禮詩

丙寅

萬古生民首千秋祭典光

攝儀專國學展禮詣書堂言念承

宗社何曾致治康徘徊講筵側惟覺愧宮牆
西廡向

東與端凝殿相對者為

懋勤殿

御筆扁曰基命宥密

聖祖仁皇帝沖齡曾讀書於此今為內廷翰林兼直之
所凡圖史翰墨之具皆貯焉每歲秋讞時刑科
覆奏本上

皇帝御殿親閱招冊內閣大學士學士及刑部堂官
面承

諭旨於此

聖祖仁皇帝御製懋勤殿讀尚書至無逸篇有作詩

元化幹四運淑景催芳年乾乾總萬幾寸陰惜屢遷
綈几散瑤帙阿閣颺爐煙澄懷求至理孔壁存遺編
公旦訓無逸則古多所宣言念小民依田功稼穡先
天命良匪易敬德省厥愆法戒備近王炯炯斧扆前
寤寐思古人千禩精意傳端居不遑暇三復期勉旃
再南為批本處

聖祖仁皇帝御筆扁曰慎幾微凡內閣擬票本章俱經
本處進呈

御覽然後票寫清文交閣又南西出者為月華門
門之南為內奏事房每日內外臣工所進奏章
由外奏事諸臣接入於此交內奏事進呈得
旨後仍由此交出轉而南向北者為南書房內廷詞
臣直廬也其東為宮殿監等辦事處

聖祖仁皇帝御筆扁曰敬事房 昭仁殿之左東出者

為龍光門 弘德殿之右西出者為鳳彩門 乾清宮後為

交泰殿 滲金圓頂制如中和殿

聖祖仁皇帝御筆扁曰無為

御筆聯曰恒久咸和迓天休而滋至闕睢麟趾立王化之始基殿中設

寶座左安銅壺刻漏右安自鳴鐘

國朝

御用寶璽二十有五俱尊藏於殿中

御製寶譜序 國朝受

天命采古制為璽掌以內閣承收以宮殿監正襲以重
盪承以髹几設交泰殿中以次左右列當用則內
閣請而用之其質有玉有金有旃檀香木玉之品
有白有青有碧紐有交龍有盤龍有蹲龍其文自
太宗文皇帝以前專用國書既乃兼用古篆其大小自
方六寸至二寸一分不一嘗考大清會典載御寶

二十有九今交泰殿所貯三十有九會典又云宮
內收貯者六內庫收貯者二十有三今則皆貯交
泰殿數與地皆失實至謂皇帝奉天之寶即傳國
璽兩郊大祀及聖節宮中告天青詞用之此語尤
誕謬大祀遵古禮用祝版署名而不用寶聖節宮
中未嘗有告天事或道錄祝釐時一行之亦不過
偶存其教耳未嘗命文臣為青詞亦未嘗用寶且
此璽孰非世世傳守而專以一寶為傳國璽亦不

經蓋緣修會典諸臣無宿學卓識復未曾請旨取
裁只沿明時內監所書冊檔承譌襲謬遂至於此
甚矣記載之難也且會典所不載者復有受命于
天既壽永昌一璽不知何時附藏殿內反置之正
中按其詞雖類古所傳秦璽而篆法拙俗非李斯
蟲鳥之舊明甚獨玉質瑩潔如截肪方得黍尺四
寸四分厚得方之三以為良玉不易得則信矣若
論寶無論非秦璽即真秦璽亦何足貴乾隆三年

高斌督河時奏進屬員濬寶應河所得玉璽古澤
可愛文與輟耕錄載蔡仲平本頗合朕謂此好事
者仿刻所為貯之別殿視為玩好舊器而已夫秦
璽煨燼古人論之詳矣即使尚存政斯之物何得
與本朝傳璽同貯於義未當又雍正年故大學士
高其位進未刻碧玉寶一文未刻則未成為寶而
與諸寶同貯亦未當朕嘗論之君人者在德不在
寶寶雖重一器耳明等威徵信守與車旗章服何

異德之不足則山河之險土宇之富拱手而授之
他人未有徒恃此區區尺璧足以自固者誠能勤
修令德繫屬人心則言傳號渙萬里奔走珍非和
璧制不龍螭篆非斯籀孰敢不敬信承奉尊為神
明故寶器非寶寶於有德古有得前代符寶君臣
動色矜耀侈為瑞貺者我

太宗文皇帝時獲蒙古所傳元帝國寶容而納之初不
藉以為受命之符由今思之

文皇帝之臣服函夏垂統萬世在德耶在寶耶不待智者而知之矣善夫唐梁肅之言曰鼎之輕重璽之去來視德之高下位之安危然則人君承

祖宗付畀思以永膺斯寶引而勿替其非什襲固守之謂謂夫日新厥德居安慮危凝受

皇天大寶命則德足重寶而寶以愈重璽玉自古無定數今交泰殿所貯歷年既久紀載失真且有重複者爰加考正排次定為二十有五以符天數竝著

成譜而叙其大指如此

御製刻漏銘 粵昔重黎分司地天迎日揆景舉分

測辰明時敬授欽若昊乾予承百王省歲祈年齊

政協紀命彼疇人徼宮戒井斟衡酌權范金規木

製茲漏蓮玉注金甬水火燥寒協其高卑別以方

圓九十六刻成一日焉視彼陽晷明晦無愆較自

鳴鐘淫巧徒傳攝提有紀孟陬用平于以考時寢

興慎旃于以熙績勤民禮賢業業兢兢俯察仰觀

器與道偕是驗是虔作銘垂戒貽百曾元 兩廡
間左出者為 景和門右出者為 隆福門殿
之後為

坤寧宮俱順治十二年建殿廣九楹其 東暖閣

御筆聯曰天惟純佑命俾爾戩穀百祿是荷民其勅

懋和綏以多福萬國咸寧閣上扁曰福德相聯

曰功德莊嚴輝寶月薰聞安樂引祥風閣下東

室扁曰紫垣西室聯曰斯干咏松竹天保頌升

恒宮左為 東暖殿

世宗憲皇帝御筆扁曰位正坤元右為 西暖殿

御筆扁曰德洽六宮二殿與 昭仁 弘德二殿相

對俱康熙三十六年建 東暖殿之東為 永

祥門稍北為 基化門俱東出 西暖殿之西

為 增瑞門稍北為 端則門俱西出 坤寧

宮之後北向正中為

坤寧門門外即 御花園也

御製坤寧宮銘 萬物致養是曰

厚坤安貞廣大配

天為元昔在

盛京

清寧正寢建極熙鴻貞符義審思媚嗣徽松茂竹苞
神罔時恫執豕酌匏廣博無疆黃中正位以繼以繩惟
曰欲至於萬世

御製小除夕坤寧宮作詩 壬申

喜氣盈宮寮迎除

先頌椒從來稱五祀不覺到今宵爆引雲車上

天臨絳節朝誠祈詎私禱六幕願均調

御花園在 坤寧宮後左曰 瓊苑東門右曰

瓊苑西門園中奇石羅布嘉木鬱蔥有古柏藤

蘿皆數百年物

御製仲春御花園作 甲子

穠春何處歸來早堆秀

山前絳雪軒已許遊蜂依蕊簇未教新燕傍枝翻

周阿玉樹斜臨榭放溜金波曲抱源渴望甘膏疎

宴賞休言樹背有叢萱

御製御花園花朝詩 丙寅

堆秀山前景物芳更逢

晴日靄煙光負冰錦鬣遊文沼試暖文禽遶畫堂
綵燕繽紛先社日青旂搖曳引韶陽莫嫌花事遲
追賞通閨應知春倍長

御製御花園首夏詩 丁卯

宿雨輕煙晝綺櫺尚餘

春色博山屏蒼松四季曾無改也覺虬枝分外青
一陣香風遞玉墀却緣錦綻墨辛夷幾餘點翰

消繁慮幸似去年倚檻時
婪春破夏日方永委

砌篩簾絮正紛最是常年添悶處底教觸目總成

欣

御製詠御花園藤蘿詩

丙寅

禁松三百餘年久女

蘿施之因亦壽每攜春色見薰風似顧杏桃開笑
口或蒼或艷雖不倫齊年恰比列仙眞窺戶小兒
髮已雪雙成綽約猶嬌嬪蜂衙蝶陣年年判兔葵
燕麥何須歎清和沐雨影亦鮮便入蝦鬚上龍案

晝長幾暇倚玫除南畝初霑憂慮舒却憶風人善
體物匪伊垂之帶有餘

御製御花園古柏行己已

摘藻堂邊一株柏根盤

厚地枝挈天八千春秋僅傳說厥壽少當四百年
御園松柏森森列居然巨擘標蒼顏粗皮碑兀心
不死倚壁如拍洪崖肩左日右月為兩目春草秋
花參四禪仙人煉氣不煉肉形若槁木神乃全昔
者公旦象六爻是為九二見在田又如瑤池會王

母赤松子應領羣仙韋偃直幹不可得而今誰者
以神傳洪宣承平此曾閱甲申桑海無還丹喬木
頗與世臣類作歌詎止斐鴻篇 正中為 天一
門前列金麟二門北南向為

欽安殿祀

元天上帝

御筆扁曰統握元樞頂安滲金寶瓶殿前方亭二其
東稍北疊石為崇山山正中有石洞洞門顏曰

堆秀左側鐫刻

御筆雲根二字山巔有亭曰御景亭山之東為

摘藻堂內經史子集插架四周

御筆扁曰摘藻抒華聯曰庭饒芳琰鋪生意座有芸
編結古歡西室門外聯曰左右圖書靜中涵道
妙春秋風月佳處得天和門內扁曰宿鳳聯曰
從來多古意可以賦新詩

御製摘藻堂詩已已

文軒構瓊苑仙柏蔭廣宇題

額縱自今考蹟亦云古芸編貯萬卷牙籤分四部
淡泊以怡情節儉斯貽祐揆毫戒麗妍守器懷神
巨卑茲力溝洫無間惟稱禹

御製題摘藻堂詩

辛巳

浮碧亭陰瀟灑居春風綈

几正怡如映窓黛鬱千年樹插架芸芳四庫書鑒
在勝朝基命密遊惟義府勅幾餘展編寧貴資摘
藻二典三謨永企予 堂東為 凝香亭堂前有
池池上為 浮碧亭亭之南為 萬春亭再南

向西者為 絳雪軒前多植海棠軒內

御筆扁曰視履考祥聯曰東壁煥圖書琳瑯滿目西
清瞻典冊經緯從心右室聯曰樹將暖旭輕籠
牖花與香風竝入簾又內室聯曰花初經雨紅
猶淺樹欲成陰綠漸稠皆

御筆軒南即 瓊苑東門也

御製絳雪軒海棠詩

庚午

丹砂煉就笑顏微開處

春巡恰乍歸暇日高軒成小立東風絳雪未酣霏

評香花國休嫌細選色唐宮不礙肥料量韶光思
護惜珠簾四面巧成圍

御製絳雪軒海棠詩 壬申

藉典春行命蹕迴御園

問景一徘徊似緣翠館今朝幸不約東風特地開
綴玉有詩笑桃李蕊珠何處惹塵埃丁寧嫌雪枝
頭駐莫便尋常點綠苔

御製絳雪軒詩 辛巳

名軒因對花取義緣體物酣

春雖尚遙符甲機已鬱即看六霙積何異嶸山蔚

金麥玉壺供銀燕綵屏拂休徵協雨暘宴息宥密
勿欽安殿之西稍北為延暉閣閣上

御筆扁曰凝清室東間聯曰雪朗西山送寒色花輝
東壁發生馨樓下聯曰麗日和風春淡蕩花香
鳥語物昭蘇又聯曰錦座凝香花敷春苑麗晴
牕挹翠霞帶曉屏舒

御製延暉閣春望詩辛巳禁林崇閣枕紅牆暇日

登臨喜載陽北戶景山秀堪揖南墀古柏儼成行

宮庭基業期恒固帝里樞機協大當累洽百年誠
富庶持盈惟是敬為防閣前相對為四神祠閣
西為位育齋齋西為毓翠亭齋前有池池
上為澄瑞亭即亭為斗壇亭南為千秋
亭又南為養性齋齋東向者七楹南北向相
接者各三楹皆有樓樓上正中

聖祖仁皇帝御筆扁曰飛龍在天左室聯曰心蹟只今
偏愛淡詩情到此合添幽又聯曰一室虛生無

限白四時不改總常青右室聯曰自是林泉多
蘊藉依然書史得周旋又聯曰日永亭臺爽且
靜雨餘花木秀而鮮樓下正中

御筆扁曰居敬存誠聯曰體道鳶魚看活潑消閒書
史挹菁英又聯曰暇當綈几身聊憩景入紗疏
意與存北樓下西向扁曰悅心頤神聯曰古香
研道秘新藻發春妍南樓下東向聯曰四季風
光無盡藏百城古帙有餘馨皆

御筆齋之南即 瓊苑西門也 欽安殿之後為

承光門北向列金象二左為 延和門右為

集福門東西向正中為 順貞門其北相對為

神武門門外有下馬牌石即 紫禁城北門

也

日精門之東為東一長街南即 內左門中為

近光左門北為 長寧左門稍北而西即

瓊苑東門也由 近光左門而北向西之門凡

三曰 咸和左門 廣生左門 大成左門

咸和左門之東相對為 景曜門中間南向者

曰 景仁門門內為

景仁宮前殿

御筆扁曰贊德宮闈 廣生左門之東相對為 履

和門中間南向者曰 承乾門門內為

承乾宮前殿

御筆扁曰德成柔順後殿聯曰三秀草呈雲彩煥萬

年枝茂露香凝 大成左門之東相對為凝
瑞門中間南向者曰 鍾粹門門內為

鍾粹宮前殿

御筆扁曰淑慎溫和聯曰篆梟猊爐知日永風清虬
漏報春深以上三宮俱順治十二年重建三宮
之東為東二長街南則 麟趾門北則 千嬰
門也街東與 景曜門相對者曰 凝祥門再
東為 昭華門中間南向者曰 延禧門門內

為

延禧宮前殿

御筆扁曰慎贊徽音與履和門相對者曰德陽

門再東為仁澤門中間南向者曰永和門

門內為

永和宮前殿

御筆扁曰儀昭淑慎與凝瑞門相對者曰昌祺

門再東為衍瑞門中間南向者曰景陽門

門內為

景陽宮前殿

御筆扁曰柔嘉肅敬後殿聯曰古香披拂圖書潤元
氣沖融物象和東室聯曰生機對物觀其妙義
府因心獲所寧西室聯曰蜃牕日朗蘭噴霧雞
樹風輕玉靄春又聯曰書圃禮園無數好甌香
研淨有餘欣以上三宮皆康熙二十五年重建
此東六宮之叙置也六宮之東有小長街街南

向東直出者為 蒼震門街東為內庫房其北
向西者為 欽昊天門中向南為 天穹門門
內為

天穹寶殿祀

昊天上帝

御筆聯曰無言妙化資元始不已神功運穆清 千
嬰門之北有殿宇五所謂乾東五所也由

日精門長街而南其東為 仁祥門再東相對

為陽曜門正中為

齋宮雍正九年建凡

南北郊及

祈穀常雩大祀

皇帝致齋於此前殿五楹中設

寶座

御筆扁曰敬天聯曰克踐厥猷聰聰祖考之彛訓無

數康事先知稼穡之艱難東暖閣聯二一曰

天道欽崇永保命萬幾敕毖屢省成一曰一念
純誠昭格本萬緣清淨旦明中 西暖閣聯曰
皓月空懸心鏡朗妙雲擁護智珠圓後殿

御筆扁曰誠肅殿又扁曰莊敬日強聯曰慎獨謹幾
旦明懷帝載思艱圖易宵旰念民依東室聯曰
一編金鑑懷無逸五夜銅籤警未央西

寢宮扁曰敬止聯曰午夜端居欽曰旦寅衷昭事格
惟馨又聯曰洗心宥密欽義傳致德精明稟禮

經又聯曰吉蠲致敬先三日昭格惟誠矢一心

御製齋宮詩六章章十四句 壬戌 有恤齋宮翼翼

沈沈穆穆

皇考心

聖祖之心丕冒萬宇

上帝是欽維日南至郊祀孔臨遷坐變食在懸無音凝

祉受釐儼若

帝歆來戒來齋用凜難諶 龍塞之山儲有良材乃浮

於川達帝京不遲爰經爰營載築載培命彼大匠
繩尺是依其柱維楠其桷維柏不文不鏤海望所
作既底厥法載觀其落猗與煌與天闕之宇鬱
崑崙棧貝箔珠戶枚枚巖巖在乾清宮左有丹其
楹有青其瑣既深以嚴亦安而妥不敞不軒周廬
綿綿曰維億年利我後人昔在

聖祖心齋肅肅

考建茲宮匪誇華屋致潔致誠毋疏毋黷律中黃鍾一

陽始復將事大祀心乎穆穆爰即而齋爰熏而沐
瞻仰

昊穹以集厥福 自古建章萬戶千門亦有大夏摧唯
成觀彼何為兮此則可原匪以富而侈匪以飾而
繁制樸而渾居茲敬存有堂則明有室則溫我後
子孫永保斯孔安 永言保之戒彼崇臺我宅是
宇心乎我思我

祖我

考廓此丕基我曷承之俾堂構是貽

天饗惟誠民歸惟慈惟慈惟誠匪以偽為我後子孫尚

克念茲

世宗憲皇帝御製冬至齋宮詩 晨曦炯炯潔齋宮一

縷爐煙散綺櫳暖氣潛回葭管律早梅先綻玉階風
中孚默契天人理來復明彰造化功漫道書雲成故
事精裡惟藉寸心通 凌寒松柏耐嚴冬帶月含霜
度禁鐘午夜無眠思戒凜詰朝崇祀務齋恭初陽鼓

動開三殿萬象昭回映九重嘉節屆臨生意始虔祈
上帝惠吾農

御製冬至齋宮偶閱舊稿誌懷詩

戊午

靜聽迢迢

宮漏長齋居暫屏萬幾忙那無詩句娛清景恰有
梅梢送冷香案積陳編閒檢點志期舊學重商量
灰飛子夜調元律又喜天心復一陽

御製冬至齋居詩

庚申

消息初陽復

南郊大祀臨一衷思

帝載至日見

天心丙夜幾常勅齋居念轉深燭柴將對越惴惴敢忘
欽

御製冬至齋居詩

辛酉

對越乾乾矢素衷更臨

裡祀惕淵沖齋宮夜永添松漏緹室陽回協月筭省歲
每期時不易占年惟望雪酬豐案頭編簡閒披閱
舊學商量慎始終

御製夏日齋居詩

壬戌

歸鴉噪宮城暮景侵虛殿

金祀羅夏卉芳被薰風扇而予適齋居志豈循物
玩曠懷熙皞治未愜黔黎願撫景每增慚披衣坐
待旦

御製冬夜齋居詩

壬戌

應節灰飛琯書齋金寫人

扶陽思往聖省歲驗斯民斜景依南陸羣星拱北
辰肯堂欽至教同此凜

明裡

御製上辛祈穀齋居詩

癸亥

三朝度王正六日屆

上辛青陽霽彤墀海壖含韶春萬彙昭以蘇昌昌
答令辰惟予繼百王祈穀遵先民滌志此齋居穆
穆將

明裡心乎曷思維政事有弗勤屋漏苟或愧其奚對

昊天

祖宗廓丕基肯構賴子孫彼野有遺賢何以拔茅掄彼
民有竊歎何以咸聽聞凡此恭默思愧忤流汗頻
尚希鑒予衷維

皇降康年

御製夏至齋居即事詩

癸亥

黼宸遷常座明堂闔

左扉撫辰懷嬪代勅命凜時幾北陸將依晷南薰
漫叶徽蕩暄風習習燭鬱旭暉暉齋處封章少遙
聞晝漏稀敢祈誠意假因驗道心微

御製冬至齋宮疊舊韻詩

癸亥

金翼南飛綫晷長

驂驔六御趁歸忙將陳

寅祀虔心璧又領齋居戒意香小往大來堪體驗民情

物理入籌量八年政教曾何補負宸常懷愧答陽

御製祈穀齋居述懷詩

甲子

元日將祈穀齋居滌

志清

天人畏相與理欲驗方萌澤共初春布心存旦氣平九
年勤實政一意黜虛名每勵終如始由來滿易盈
過因德涼積災為治乖呈午夜頻惶促衷懷益屏
營明廷咨碩輔何以慰予情

御製夏至齋居詩

甲子

消息無停運易簡理不窮

平秩南訛時昏亢旦危中

矩澤將有事齋處於法宮惺惺既滌志夔夔復省躬况
當望雨殷益覺憂心忡彭怒張飛廉炎歆畏祝融
一飢已不啻玉食忍獨豐開卷遣煩緒往復披難
終鏡已率增慚胡寧識予衷

御製冬至齋居詩

甲子

金翼南飛候土圭北至時

精裡遵在昔齋宿重於茲黍谷陽將復蓮簫刻欲遲戒
心恒惴惴思過每夢夢政治嗟何似慚惶只自知

黃雲陳日下太史漫陳詞

御製上辛祈穀齋居詩

乙丑

青陽臨左个精祀考

裡宗萬寶祈惟穀三時重在農良宵自徙倚淑景
漸春容詩思來相湊穿牕午夜鐘

御製雩祭齋居詩

乙丑

節惟龍已見卜云吉其符

圜丘將有事祈歲為民謀齋居滌身心顯若敬以孚冬
春雪雨滋慰我三農夫舉趾播嘉種胼手闢荒蕪
羣然望豐稔將謂逭饑臞芄芄未觀麥青青已瞻

蒲設十日不雨此意復虞辛空庭盼雲脚佇立徒

嗟吁

御製夏至齋居詩

乙丑

撫序夏維至占時月屆臯

明禋修祀典勅法省刑曹自是當遷坐從來不舉醪心
憂遙卜歲志慰近霑膏觀象思羸豕聞聲應伯勞
清宮本無暑不必學禪逃

御製齋宮疊舊作韻詩

乙丑

將臨

大祀惕予躬肅肅清齋此在宮一氣迴時天意見諸緣

淨處道心融閒聽韶磬松風外坐驗周奎日影中
昭事惟馨吾敢謂只餘顓若數年同

御製祈穀齋居詩

丙寅

黍谷氣昭蘇鄒律春迴旋

中辛為上日祈穀陳衷淵國家有與立所賴民之
天伊古重茲祭承事敢弗虔矧予德滋薄調燮無
神權十歲稔鮮書曠勞或連綿遑云政無疵敢謂
朝進賢刑罰固已省詎無盆底寃比戶縱蠲租富
庶何有焉凡此恭默思益覺增惕乾齋宮清漏永

琴書靜且妍朝來佈同雲玉祀頻俄延何當六出
花尺盈三輔田

御製常雩齋居詩

丙寅

宜暘宜雨信無違茂對清

和麗瑣闥敢詡休徵符肅乂不忘勅命凜時幾齋
宮籟靜猗烟直高閣宵清玉漏稀却憶邇年當此
際望雲常自夜披衣

御製夏至齋居詩

丙寅

北至將臨祀清齋此勅躬

景量銅望臬暑避玉宸宮浴德藏於密祈年慎厥

終敢誇膏澤沛惕息曩時同

御製冬至齋居疊舊作韻詩

丙寅

評論晝短與宵

長旋轉羲娥了不忙乍對銀缸遲漏刻因披青簡
發芸香姬公易象原堪見工部詩懷未易量遷坐
致齋欽祀事天心來復又開陽

御製祈穀齋居詩

丁卯

祈穀齋居當穀日轉寅首

祚倍寅恭重民三事曰惟祭陳政九疇端在農節
物漫教輝火樹春容先自警宵鐘明衣景仰宣尼

慎詩句清吟更有顯

御製雩祭齋居詩

丁卯

勤民重農功稽典肇雩祭

聖訓必躬親頻年謹從事北方春旱多率是成常例龍
見未屆期祈請先小祀

南郊步禱時忸怩責躬備去歲蚤邀

眷首夏甘霖賜麥無禾則有已足叨

明惠今年乃更幸膏澤春常暨孟夏月之朔優渥遠邇
逮撫時舉常雩齋居切虔致受寵宜若驚此理無

巨細廣殿引薰風
累愚晃新霽
慰懼兩相縈要矣
終年計

御製夏至齋居詩

丁卯

元祀儼將臨
遷坐凜明旦

讀卦玩金柅
撫時卜石燕
豈惟例撤樂
早已勅減膳
修省切衷獨愧以諭羣
彥驕陽烈中天
炎風蕩廣殿
廣殿清嚴所尚不禁煇
燭傷哉彼稚苗
待澤亟隴畔
日暮未興雲翹首益增歎

御製祈穀齋居詩

戊辰

排遣閒情解百憂
區區肯

為一身謀惟清六志將祈歲資始三春此迓庥靜
聽問閤誠既庶却慚富教尚難周所希大有寰區
徧禮義隄防好細求

御製冬至齋居詩

戊辰

齋宮仍几此清哦眞覺光

陰迅織梭靜裏檢量一歲事何其樂少祇憂多

御製夏日齋居詩

己巳

方澤將臨祀清蹕返法宮齋居用蠲潔漏永南薰風春
夏雨早霑麥禾可冀豐迴憶數年來厚幸鮮或逢

平秩欣南訛益切乾乾衷

御製祈穀齋居詩庚午發歲祈靈

大享壇齋居清夜未云闌惟幾永念欽惟命自省何能
強自寬涖政久虞敷政忽閱人多覺識人難所希
鴻貺綏豐屢粗與吾民共治安

御製雩祭齋居詩庚午龍見舉常雩為農祈雨澤

匪故必躬親

穹壇奠蒼壁受福志敢希勤民心實劇自我肇元祀率

際望霖迫去年實厚幸今春足三白邇日每作風
炎燥虞傷麥

圓靈錫嘉貺甘膏沛一夕餅餌香應期禾黍生皆勃屈
指數年中如茲曾幾值孰謂予過憂予憂未虛擲
御製夏至齋居詩庚午短晷圭臬直景風殿閣生

致齋潔予志對時體物情孜孜奉日德慄慄欽火
行族雲已翳鬱膏雨將澍零祇期苗待蘇那憐卉
爭榮網軒崇以邃宜涼意氣清蔭暘豈徧及卻暑

慚獨寧

御製祈穀齋居詩

辛未

伊古重民天祈穀實

大祀仲辛屆首春東郊逮于耜遷坐御齋宮猶懼吾心
弛銅人如師保屋漏十手指微誠冀少通貺我豐
年美豐年豈易綏寰宇博九陟大有信希邁粉飾
我不為水旱亦常有濟之在及時所虞人力薄究
賴

天恩垂

天恩匪可倖孜孜勉勤政省方典固昭與祭義應敬歲
事乃啟蹕孚顒仰

神聽錫福和且平願共斯民慶

御製夏至齋居詩

辛未

逼閏節候遲北至月將徂

致齋居法宮薰風度瑣疏雨時祛炎歊晝長屏讌
娛靜驗消長機切體治亂塗終始慎厥與斯言良
警予 誓戒勅有司大祀簡庶務萬幾惟一心豈
有可息處春巡經四省率幸春苗佈桃源數州縣

歉後常塵慮麥秋究何若諮詢馳驛路譬父母憐
子尤切於新晤 沈沈中禁夕丁丁高漏遲翩翩
燕羽頽細細花氣馥英英雲復佳夜雨庶可期甘
膏豈辭多禾黍率長齊因憶當往年正歌雲漢時
御製祈穀齋居詩 壬申 大祀重初辛清齋潔意身

幸看田積玉恰應日臨人咨政常多愧求賢若可
親敬勤隨歲永憂樂後先頻

御製雩祭齋居對雨之作 壬申

常雩非望雨值雨

益麻徵繡野春餘潤油雲午更凝松濤聽漸息簷
溜看徐增卜度田功茂淵懷愜靜憑

御製大齋詩 壬申

大齋庶政屏晝接廷臣退延佇

玉砌間俯仰銅人對九德緬古昔一心周宇內剛
柔協強變豐歉籌保乂宵旰念民依旦明懷

帝載

御製齋宮書事詩 壬申

致齋廣殿晝沈沈綠潤庭

槐布影深明旦曰臨欽勅命雨暘時若祝關心敢

忘渴望經疇昔益切冰兢繼自今芳草牕前宜靜
寄晚來又喜作輕陰

御製夏至齋居詩

壬申

朶殿納薰風雨後生微涼

致齋屏庶政益覺清晝長渴烏滴珠遲旱渠流綺
香時紀驗伏陰王道欽扶陽畢然懷古人仲舒三
策詳

御製正月二日祈穀齋居對雪詩

癸酉

元正纔過

致齋虔典重祈年倍切懷靜聽排門鳴爆竹春音

一片與人諧 六出霏霏入晚濃
玉花分綴禁中松發祥捷報新春喜
不問詞林問老農 惠山仿得竹爐成
臘月嫌微未試烹 今日優霑方愜意
合尋韻事煮三清 臘底敲吟間濶踈
新年清興共春舒心花喜映祥花潤
萼申勾芒盡起予

御製雩祭齋居詩 癸酉

甘霖霑暮春麥隴蓬蔥翠

大田亦已播南畝無閒地比似向年間
籌農心實慰常雩此致齋敢忘勤民事
族雲傍晚濃希霖仍

切意澤豈辭其優况乃逾旬既風勢漸刁騷又覺
愁弗置

御製夏至齋居詩

癸酉

景短日長候分龍占雨朝

剛欣五寸繼又隔一旬遙塵意依千畝齋居守禁
寮扶陽有明訓敢不惕於昭

御製常雩齋居詩

甲戌

旬餘逢八齋端居得靜便

靜便心應適而轉愁緒繁緒繁云緣何望澤意殷
然往來郭門外非不麥芊芊及時施甘膏乃可期

餅餠絮雲亦屢作率被狂風牽齋無不用敬

明禋况祈年望柱占礎潤遑問春闌珊

御製冬至齋居詩

甲戌

子半陽生候齋居意倍虔

端惟乾是體詎止坐云遷午夜塵無逸四時祈有
年同雲天宇重翹望又依然

御製祈穀齋居詩

乙亥

微霰雖飄望密零經冬顯

佇不遑寧首勤農政祈初歲仰冀

天禧佈始青人日欲迎輝綵勝元正甫過頌椒馨致齋

宴賞都無事朝夕疇咨引在廷

御製雩祭齋居詩

乙亥

齋宮路寢左

大祀乃遷居一歲率三度此心弗改初春霖霑綠野和

旭靜丹除

天貺今年疊持盈益畏予

御製進宮齋戒之作

丙子

民天重祈穀致齋返九

重滌慮屏庶務遷坐居法宮顯若對銅人如臨師
保同惟有望江南災餘憫彼農何當大轉旋澤國

綏我豐

御製齋居即事詩

丙子

朶殿深沉暑不留清齋晝

靜篆煙浮短長南北日占晷小往大來易惕周覺
道有風原解愠思量無雨那消愁問予愁果全消
未尚為籌邊繫念悠

御製齋居詩

丁丑

鶉首星臨次羲車日最長辨方

慎水火協紀驗柔剛鷄漏報遲箭龍舟罷遠塘端
臻緣忘祀詎為度端陽

御製正月進宮齋戒作

戊寅

行春卜吉奉

徽音大祀先庚返禁林東陸心期金兆穰西山背指玉
為岑鳳城萬戶桃符煥太液長橋蟠螭尋北寺南
臺佳且便虔齋未敢事登臨

御製雩祭齋居詩

戊寅

剛過夏禘致追思即值虔

齋雩祭時敢恃霑膏優往歲益殷祈稔凜先期座
遷燕寢興居肅味徹腥辛淡泊宜蜀望誰能不萌
志雲生還切沐

恩滋

御製雩祭齋居疊去歲韻詩 己卯

又逢齋宿一回

思今日多慚是昔時豈似春膏霑去歲正當雨澤
歎愆期綢繆豫計穀其湧劑酌先商政所宜儻得
微誠通

帝鑒早施

恩霽沐甘滋

御製

北郊齋戒進宮詩已外
以我迫愁旱

慈懷亦不紓

右壇祈霖罷返蹕咨

興居遲日北至臨

大祀躬承諸豫期致虔齋復此歸彤廬
細雨雖畧霑霈
渥何有乎憶昔承

恩命代祭數歲餘北方例多旱望澤無歲無爾時廩分
憂詎今憂萃予計窮乃反本嗟哉懷始初

御製將舉大雩之祭進宮齋戒詩

己卯

廿日三進

宮憂勞產民瘼

方社及

方澤懇禱應未符計窮力已竭敢虔舉大雩徹懸屏絲
竹減膳用菜蔬思過冀回

天返躬惟責吾紫禁夏日長徬徨靡所如

御製祈穀齋居詩

庚辰

元正昨纔過翼日齋居虔

祭無不用敬況此祈民天慶典例弗舉在簾徹樂

懸歲前已立春春屏朱戶駢秋金雙麥穗綵綺太
平錢徵吉非為已所願豐農田蓮漏遲銅壺幾暇
殊清便安靜迓崇禧無妨什華篇

御製祈穀齋居即事詩辛巳

祈穀此致齋偏欣逢

穀日晴和叶嘉占遷坐孚顓謚駕瓦積雪鋪雞樹
韶光櫛寶勝扶綺疏不問知元吉新正簡幾務省
躬益精密聖狂一念間應違千里疾重熙固此時
保泰如虞失

昊貺信有徵心存祇無逸 齋宮之東為

毓慶宮前為 祥旭門再南為 前星門入門為


敦本殿殿後即

毓慶宮正殿也今為諸

皇子所居



國朝宮史卷十二



總校官庶吉士臣侍朝

校對官編修臣莫瞻菴

謄錄監生臣汪承泰